

MATRI

Matri, matruzza mia, quantu ti vogghiu beni,
la vita tu mi rasti cu' affanni e tanti peni.

Matri amurusa e provvida, cunsulazioni mia,
forti, lesta, sollicita, 'un penzi mai pi' tia.

Gioia pi' tia è la gioia di figghi e da' famigghia,
la forza tua, 'u curaggiu, a nuddu autru assimigghia.

Precisa, sempri attenta si pi' li figghi toi,
amuri e volontà ti portanu unni voi.

Si un figghiu avi bisognu, tu lassi tutti cosi,
curri senza firmariti e mancu t'arriposi.

Pronta a qualsiasi cosa, ricogghi li pinzeri,
'nta lu to' cori ranni ammucci i dispiaceri.

Matri si 'na furtizza, culonna di bontà,
la vera to' biddizza nall'arma tua sta.

Sutta lu mantu immensu da Matri du Signuri
stannu tutti li matri, li nostri pruttitturi.



UMANITÀ


Cori meu, chi batti a fari
'nta stu' munnu vecchiu e stancu,
quant'è difficili campari!

La me' testa penza ch'è strammu
fari finta d'essiri boni, sempri onesti, ginirusi;
lu cervellu è propriu stancu di 'ncassari "**cosi fitusi**"⁽¹⁾."

La 'nnuccenza di li nichì cu' cinismu è profanata;
a firucia di 'na matri sutta-supra è sbutuliata⁽²⁾,
la famigghia, fatta a tocca, comu fussi 'na sosizza⁽³⁾;
ogni amuri si ritocca e si jetta 'nta munnizza.

Attintati e terrorismi si nni sentinu ogni mumentu;
'un c'è chiù nudda spiranza chi canciassi anticchia 'u "**ventu**",
pi' turnari cu' crianza a la nostra dignità,
vasinnò chi sensu havi la palora "**umanità**"?

- 1 - cose sporche
- 2 - rigirata, sottosopra
- 3 - salsiccia



....COSI CHI CAPITANU!.... FORSI E' MEGGHIU 'UN SAPIRI NENTI?

Un tiziu, pigghiatu mischinazzu, di fuddia,
ammazzau 'a famigghia, poi si sparau, facennu totali pulizia.

'Na matri, stanca e puru esaurita,
jttau a so' figghia, sintennusi avvilita.

Un figghiu pi' aviri prestu li dinari,
sparau a so' patri, a' matri e pura a so' cumpari.

Un picciotto, chi stancu di guidari,
si ferma un pocu di latu a ripusari,
veni 'mmistuto e mori assurdamenti,
curpa di du' curriduri scancarati⁽¹⁾ e puru 'ncoscienti.

1 - senza criterio - senza senso



'Nta un paisi di l'America, un foddì furbu assai,
sfida 'a giustizia, ammazza cu' e ghiè e 'un si ferma mai.

Chisti 'i notizii chi arrivanu ogni jornu,
unu si scanta puru a taliarisi all'intornu.

Unn'è megghiu 'un sèntiri chiù nenti?
stari, ah! 'nmezzu un jardinu e riflettiri sulamenti.

Ma è giustu puru cumpatiri e soprattutto priari
picchè tutti 'mparassiru all'autri rispittari!



‘A MINZOGNA

Arrisulta già di la storia chi cu’ l’omu ‘a minzogna, ahimia, nasciu;
i picciriddi sannu tutti chi a Pinocchiu, fu pi’ chistu chi lu nasu ci crisciu.

Comu ‘u chiummu⁽¹⁾ quasi sempri, è di solitu ‘a minzogna,
cu’ la rici è facci tosta e nun prova, no, vriogna;

‘nzetta, cari e fa pirtusa, comu fa ‘na scupittata,
è scumposta e ruvinusa, comu fussi ‘na vintata;

supravveni e metti dubbi, fa la menti ammaraggiari,
porta ùmmari⁽²⁾ e zizzanii, ‘un si sapi chiù chi pinzari.

Si ‘a minzogna è rossa veru, spissi voti si scummogghia⁽³⁾,
si è chiù nica è chiù possibili d’arrivari unni si vogghia.

La minzogna, certi voti, è idda puru nicissaria
pi’ salvarì situazioni e ‘un mannari tuttu all’aria,

- 1– piombo
- 2– ombra
- 3– scopre

ditta è 'nfatti di pietà, pi' coprirli cosi dolenti
e 'un fa dannu, anzi, po' essiri comu un complici prudenti,

pi' sanari lu 'mbarazzu di cirtuni circostanzi,
dunni tutti 'i verità, fussiru sulu "**malicrianzi**".


Poi ci su ' certi minzogni, chi sunnu comu a virità,
per esempiu, 'nta' politica, chi sparpagghia ccà e ddà

notizioli assai 'mportanti, chi arricrianu⁽⁴⁾ la genti,
chi aspetta sempri cu' spiranza, ma chi poi 'un "**strinci**" nenti.

'A minzogna allura addiventa sacrosanta virità,
tantu è bedda, tantu è duci, chi a ognarunu po' 'ngannà!

Pi' alluntanari ogni minzogna, ogni autra falsità,
l'omu cerca la cirtizza 'nta' l'eterna Virità !

4 - confortano



MANCU LU PUCI

‘Un si senti d'altu parlari
chi di custodia cautelari;

arristaru a n'avvocatù,
a un sinnacu, a un privatù,

arristaru a 'na signura
chi parìa 'na matri supiriura;

arristaru a ottu 'nfirmieri,
quattru merici e un pulizzieri;

arristaru a un ginirali,
a un putiaru, a tri statali;

arristaru a un profissuri,
deci bidelli e un monsignuri:


ci mannarù avvisi di garanzia
a un parenti di me' zia;

si purtarù 'nta priggioni
li prisidenti di certi reggioni.

Nenti di stranu si 'n Paradisu
puru a li santi ci mannarù l'avvisu.

Chi maravigghia ni facemu du' restu:
mancu lu puci oramai e chiù onestu!

* per dire: che onesto non c'è proprio quasi nessuno!!!



E PASSA LU TEMPU E PASSANU LI FESTI

Natali 'nta tuttu 'u munnu veni sempri uguali,
 lu vinticincu dicembri è sempri puntuali,
 cu' lu prissepriu, l'arvulu addubbatu e luccicanti,
 cu' li strati chini di luci, li vetrini assai eleganti.

Li genti chi hannu menu pinzeri e su' cuntenti,
 accattanu riali, si lamentanu poi si nto' portafogghiu 'un c'è chiù nenti.
 Si fannu pranzi e abbuffati colossali,
 si mancia 'u panettone e autri dolci tradizionali,
 si joca a tombola, a poker, a scupuni,
 si sta 'nsieme, s'abballa, si cantanu canzuni;

si parla di paci, bontà, amicizia, amuri;
 si cerca di cancellari quistioni e dissapuri,
 si vulissi aiutari a cu unn'avi protezioni,
 si senti 'ncori di essiri chiù boni.
 Quantu spiranzi, disii, promissi, aspittativi,
 ma cu' l'annu novu arrivanu i surprisi.



L'omu s'addumanna: - chi cosa arrivirà ?
 Speriamu di iri megghiu, senza calamità –
 E campannu di spiranzi e d'illusioni,
 passa Natale, Capurannu, Pasqua, e l'Ascensionì!

EURO - AVVENTURE

'Un haiu mancu 'na Lira (ed è beru) oramai 'un si po' chiù diri,
ora, cu' l'Euru avemu a chi fari, sulu cu' l'Euru pi' l'avviniri.

A li cassi, 'ncontinuazioni s'addumanna a li cristiani:
"voli di resto Euru o Liri " - picchè ancora pi' picca si po' canciari.

'A Germania, all'annu novu, già du Marcu si scurdau,
ccà, nni niatri 'nveci, ognunu Euru e Liri ora 'mmiscau.

Ci su' genti, matri mia, chi su' allergici e' metalli;
comu fari pi' maniarì i munitèddi bianchi, russi e puru gialli?

Avemu ancora 'ntunnu a niatri anticchedda di cunfusioni:
un Euru è duemila Liri? No, è di menu, pi' la giusta pricisioni.

Pi' pigghiarisi un caffè c'è cu' paga raddoppiatu,
picchè un'Euru ci pari picca e ni metti n'autru allatu.

Ci su' tanti, veramenti, chi hannu troppa nustalgia
da liruzzu nostra antica, chi salutanu cu' malincunia.



A un pensionato di novant'anni ci attuccau in Euru 'a pinzioni,
'un ci critti, strazzau tutto, finiu o' spitali, malatu di disperazioni.

A un cristianu attimpateddu 'u restu in Euru 'un ci appattau.
"Vogghiu sordi, no sti' cosi " dissi seriu, 'a cassiera alluccuta⁽¹⁾ lu taliau:

*"Signor mio, ammatula fa, semu nall'Europa tutti uguali,
perciò s'amu abbituari puru all'Euru, sta' munita universali".*

‘U cristianu la taliau e accusi ci arrispunniu:

*"Sugnu di n'otra generazioni, forsi all' Euru 'un ci criu,
ma auguru a tutti i me' futuri
chi cu' stu' passaggu da' Lira all'Euru 'un ci sianu fregaturi ".*

1 - meravigliata

